

INUIT ATAQATIGIIT

Inatsisartuni



12. juli 2020

UKA2020/132

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kinguaassiutitigut atornerluisimasut pineqaatissinneqarnerannut atatillugu, kinguaassiuutitigut atornerlueqqinnissaq pinngitsoorniarlugu katsorsarneqartalernissaat siunertaralugu nunatsinni pinerluttulerinermut inatsisip allannguutissaanik saqqummiussisoqarsinnaaqquullugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Stine Egede, Inuit Ataqatigiit)

Tunngavilersuut:

Nunatsinni pinerluttulerinermik inatsiseqarpugut pillammik imaqarani pineqaatissiinermillu kingunilimmik siunertalik. Inatsit 1954-imi atuleqqaarnerminilli arlaleriarluni nutarterneqaqqittarpoq. Pingaartumik 1994-mi ataatimiititarsualiornerup kingorna 2008-mi nutarterneqangaatiareerluni ullumi isikkuni isikkoraa. Annikittunnguit ilanngussat allannguutilu eqqaassanngikkaanik.

Pineqaatissiinissamut tunngasortaani perarfissiinngilaq pillammik tunniussisoqartillugu katsorsaanermik pillaanerup ilaqnissaa. Taamaallaat killiligaanngitsumik eqqartuunneqartut pineqaatissinneqarnerminnut atatillugu katsorsarneqartarput¹. Ilaat ukiorparujussuarni isertitsivimmiisinneqartarput. Ukirolu allortarlugu naliliiffigineqartarput iperarneqarnissaminnut piareeqqanersut, tassalu susassaqartut akimorlugit nalilersuinerit pisarput.

Taasuma saniatigut Pinerluttunit nakkutiginnittunit nakkutigineqartussangorlugit eqqartuunneqarsimasut assigiinngitsutigut piumasaqaatitalimmik pineqaatissinneqartarput, ilaatigut imigassamik ikiaroornartumillu atornerluisuujunnaarnissamik siunertalimmik.

Maanna piffissangorluinnarpoq kinguaassiuutitigut atornerluisimasut pineqaatissinneqarnermut atatillugu pinngitsooratik immikkut ilinniarsimasunit katsorsarneqartalernissaat. Katsorsartinnerup

¹ Pinerluttulerinermi inatsitmmi kapitali 30-imi isertitsivimmi nakkutigisaasussatut pineqaatissiissoqartillugu nakkutillineremi atugassaritaasut sinaakkusersorneqarsimapput, taamaalliluni pineqaatissinneqarsimasoq tarnikku kinguaassiutinullu attuumassuteqartumik katsorsartinnissamik perarfissaqarluni, taamaattorli isertitsivimmi nakkutigisaasussatut inissiineremi qaammatit pingasut qaangerneqaqqusaanatik. Pineqaatisseeriaaserlu tamanna atorneqartillugu qaqutigorujussuaq kinguaassiutitigut atornerlunneqarismasumut atorneqartarpoq.

siunertarissavaa kinguaassiuutitigut pinerlussimasup iperagaanerup kingorna assingusumik pinerloqqinnginnissaat. Ilisimavarpuummi ajoraluartumik pinerlussimasut ilaat iperagaanermi kingorna assingusumik pinerloqqittartaut. Ilaat allaat arlaleriaqalutik.

Tamakku ilaat tassaasarput meeraanermanni, inuusuttuaraanermanni nammineerlutik kinguaassiuutitigut atornerlugaanermi kingorna innarligaasimasut. Piffissamilu tassani ikiorserneqarsimangisaannartut.

Taamaattumik piffissanngorpoq pissutsinik allannguissagutta kinguaassiuutitigut kanngutsaatsuliortartut katsorsarneqartalerpata.

Nunatsinni katsorsaasarnermik ingerlataqalerutta, kingunerilluarsinnaavaa atornerlugaasimasut aamma nammineerlutik katsorsarttalernissaminut noqqaasalersinnaaneraq. Taamaalluta tarnikkut anniaatillit ikiorserneqarnissaannut aamma periarfissamik pilersitsiartulersinnaagatta.

§ 37, aallaavigalugu apeqqummi, nr. 130-2020, Naalakkersuisut toqqaannaq pilersaaruteqanngitsut pineqaatissiinermut atatillugu katsorsasoqartalernissaannut atuarneqarsinnaavoq.

Pisortaqarfinnut aningaasatigut allaffissornikkullu kingunissai:

Allaffissornikkut annertunerusumik kinguneqarnavianngilaq, qallunaat naalagaaffianut suliakkiussassaavoq, taamaattumik annertunerusumik nunatsinni suliakkiisussaanngilaq.

Inatsisip allangortinnissaanut allaffissornikkut suliarineqarnissaa ukiup ilivitsup ingerlaneranik sivissuseqassaaq. AC-fuldmægtigep ukiup affaanik nalilimmik sulinera, tassa 250.000 kr.-iussasut naatsorsuutigineqassaaq.

Namminersortunut aningaasatigut allaffissornikkullu kingunissai:

Soqanngilaq.

Innuttaasunut aningaasatigut allaffissornikkullu kingunissai:

Soqanngilaq